

移墾門

湘民移墾西北合作社緣起

郭 皋

中國自民元以還兵燹蠶起盜匪蝟集瘡痍滿目載道流離湘省遭災較他省特酷揆厥原因其主病中於生齒日繁人滿爲患民生問題無法調劑間有慈善團體設會賑災不過臨時補苴何與本治欲求根本解決莫如移墾西北之一法 先總理提倡民生主義於建國方略中對於移墾規定極爲詳明又國民黨第一次全國代表大會農民運動決議案有移墾荒徼以均地利之策舉本 總理地無棄利國無游民之宗旨提倡開發西北拯救各省災黎十餘年來奔走南北到處宣傳無如氣竭聲嘶百無一應不得已退而謀諸桑梓同鄉中如馬鄰翼孔昭綬曾繼吾粟戡時曹典球狄昂人辜天佑王季範廖漢瀛舒漢祥成蒙三李維城陳任菴李咸亨王伯徵凌樹人周聲漢諸同志發起湘民移墾西北合作社省縣政府立案委 主任其事社址設於湖南長沙湘潭等處其宗旨以集貲移民開闢西北爲首要並印刷宣言分寄各省以資提倡十四年偕周壽椿羅先覺羅良德許履道諸君子親歷

臨河縣志

卷下

雜記

一

西北河套一帶實地察勘果爾地質肥沃氣候適宜種植牧畜斯爲奧區且交通日便文化漸開新村制度逐一實行時值達拉特旗地杭錦旗地先後報墾時無可待機不可失時機相迫愚者眯目智者捷足焉當指定臨河以北七十里六合公地方爲湘人移墾區域建屋數楹并挂領達旗地五十餘頃十五年購置牛具招募佃農著手開闢不意是年河套告變同人均南旋事竟中止 氣不稍沮仍主持社務收合餘燼力圖再舉以本社名義向國省政府提案請撥鉅款作大規模之移墾因近年國步多艱國府雖有組織全國墾殖委員之計劃迄未實行 一息尙存必以再接再厲之神貫澈此殖民移民之志大而風行全國小而實行湘省此 之責也十六年 長河北南宮公安局不得親履墾地擬將眷屬移套以子姪輩暫代其事爲破釜沈舟之計詎料包西道梗移家至包頭而止十七年春路通託凌君樹人偕 長子先哲等盡室赴臨僑寓六合公實行工作如修渠闢荒牧養牛羊植樹種菜男則刈穀造林鋤雲犁雨女則牽蘿澣葛戴月披星田家樂趣較湘省尤爲濃厚焉十九年 抵臨建築西正街私人房舍迭接同鄉黃女士碧源等函件匯款購地移墾西北之結

約日形堅厚惟願我鄉人不畏難不惜費不辭勞負襁至秉未來通力合作建百年之渠澮
藝萬畝之桑麻俾我父老子弟含哺歡歌擊壤嬉遊以爲各省開其先路豈不盛哉豈不快
哉

臨河膠東移墾社紀事本末

黃子義

魯省東隣渤海北筦津平南控徐淮西障汴維泱泱雄風誠南北之綰轂黃河流域之奧區
也沿海登萊人民負有遠志往往踰海走遼瀋企圖實業肩負而去輩運而歸近年生齒日
蕃人滿爲患負襁秉耒移墾東三省者歲以數十萬計起視郊野流離載道貧民仍不加少
有心者亟思另籌一善地以安插之時勢之所迫者然也民國十四年東魯黃君樂德服務
於西北軍總部縱攬綏西沃野千里民戶寥落棄若甌脫殊屬可惜時值馮總司令有志發
展西北爰商諸綏遠李都統允照山東移墾外極端贊助黃君偕諸同志卽日返里徧歷鄉
里縷陳移墾河套之利奔走號呼糾合同志集貲萬餘元定名曰膠東移墾社十五年春返
綏在都督署立案聯袂來套週歷勘查至達旂地白爾塔臘察汗淖等處購地百餘頃於李

臨河縣志

卷下

雜記

二一

貴橋地方建築田廬置備農器選擇籽種若者分租若者分佃若者自種耗貲數千元歷時
五六月規模大定專恃東作日興西成露積矣詎料西北軍退駐後套土匪蠶起橫行鄉曲
焚擄淫掠喚鶴日驚哀鴻徧地移墾事業盡付泡影計損失不下萬元其墾民欲進不能欲
退不得又值大劫甫脫比年天災兵禍紛至沓來渠堙田蕪補救無方已往者言之寒心未
來者聞之裹足蚩蚩何知舉歸咎於一二代表求全之毀衆矢集的此真欲辯無從而亦不
必深辯者也所幸革命成功政府注重民生遠略宏模行將實現惟望我老兄弟暫忍須臾
以待地方大定水利普及同心協力課農造林實業發達蒸蒸日上我墾民必有含哺鼓腹
食樂利於無疆者豈不快哉

魯民移墾紀事罪言

談何容易舉千百族窮蹙無告之貧民移之於絕塞廣漠之域而爲之分其田理正其經界
建立廬舍購置耒耜籌備其牛力籽種使之聚而不擾比而不好相養以生相資以長是必
有詳實之估勘親切之結約充分之經濟先事之規畫而後乃可與言移墾初非隨指一方

而可以來之任舉一地而可以安之也記者當民國十一二年服務保署及歷北平政界披閱報紙卽聞有魯民移墾綏區之事未嘗不欣欣然爲我魯民幸也及詳翻公牘竟無其事以爲有此創議并未見諸實行也迨十四年一月復蒞五原任紳董僉稱魯民移墾不日實行記者徧查近數月檔案竟無片紙隻字涉及此事猶以爲傳說不足深信也及三月初旬有同鄉于君培祥以山東移墾事務所委員名義投刺請見及延見後于君聲稱魯省墾民千戶現由包頭出發不日到五云云詢以事前指定何地是否派員估勘是否建築房舍是否購就牛力籽種是否籌有相當之經費于君均對以不知迨墾民全部抵五暫借住水利局東院是時也田無一隴房無一椽粟無一粒羣情皇皇感汹汹動紀者既長是土又與有梓桑誼既不忍作壁上觀又不能爲井中救只有設法籌供糧芻以維現狀而已幸而馮督辦及綏遠當道連電王紳同春囑撥地貸糧妥爲安置王紳先借出糜米若干石各渠地二百五十頃衆心稍安嗣王主任鴻一先生到五事有主者當然就緒當分懇民二百餘戶駐固陽分七百餘戶駐臨河適值臨河分治達旂地報墾分給駐臨墾民地七百五十頃一夫

臨河縣志

卷下

雜記

三

百畝以內地之人工治後套之地力穀應不可勝食矣無如後套之田以水爲命脈墾民無費開渠地不能上水之原因一墾民人地生疎與水利當局隔膜地不能上水之原因二墾民勢如散沙不知顧全全局既不能各出人力合衆挖渠又不知各爲堤防反水患爲水利地不能上水之原因三有此三因而騰騰沃壤變爲磽磽石田計自領地以來每年種地不及五分之一吾魯民飢困顛連真有欲進無門欲歸無路者矣查墾民來套本不足千戶臨河之七百餘戶祇以連年田地失種廢然氣沮接踵回籍及轉徙他圖者比比皆是十五六年間只存四五百戶迄今更日見減少矣所有二三百頃之餘地當事者名之曰公地所有收益指作移墾事務所公用究竟事務所十五年一現於五原十六年再現於臨河十七年三現於五原如曇雲泡影隨生隨滅初不待公地之補助總之如登肉於俎羣思爭嘗一櫛爲快甲攫之甲飽乙攫之乙飽於墾民無補也於事務所無涉也原夫移墾原議發起於王鴻一先生先生愛國愛鄉遇事勇爲其奔走呼號而得有此舉也請准魯省府由實業廳籌款七萬元又分令各縣每縣攤認七百元計共十四萬元是每戶應領一百四十元按每戶

領地一頃邀免半價先交二三成不過由各名下百四十元中扣留二十餘元其餘旅費及建築土房購買牛馬器具籽種耕作食用儘可敷用倘能全數發給更派廉幹人員爲之經紀監督必能各安其業各治其地不三年戶有餘粟人有餘財人烟茂盛比戶可封是真能爲魯民造福矣乃何以民猶是也地猶是也任若民之自聚自散自生自養他人之地萬流分潤墾民之地涓滴莫霑竈冷無烟魯困誰指室如懸磬周粟誰頌哀哉魯民親歷五年來之兵燹匪變寤甘填溝塹壑爲強毅不屈之鬼從未有一戶一人揭竿從賊爲苟活偷生之人我魯人有此特殊性洵可告無罪於地方矣所惜者性情贛直使氣任性動違人情因而意見齟齬口角爭執久而發生誤會動成冰炭究之當地賢明紳董無不理喻情恕並無畛域之見也往者難追來者可諫亟籌善後之策莫如取事務所名目概行取銷由魯政府澈底清查原案之欸作何用途浮冒者追還實銷者開除存款有餘固善如有不足設法另籌計有六七萬元卽足一日清償地價查駐臨駐固移民不過五百戶每戶百畝有五百頃卽足每頃以中地計邀免半價有三萬元卽可繳清地價此爲吾魯民籌定根本中之根本也

臨河縣志

卷下

雜記

四

一日代籌開渠由魯政府遴派樸實耐勞魯紳二三人携欸來綏欸以三萬元爲限以四分之一給駐固之墾民補助其置辦牛馬農具諸項以四分之三給臨河墾民於適中地延聘本地公正兼熟習水利之紳董勘定渠路開創支渠立定澆水章程及歲修渠費攤派辦法此爲墾民籌定補救中之補救也再由全部墾民中推定品望素孚一二員爲全部墾民之經理權一責專實行管理指揮凡對上對外統由經理負責如衣挈領若網在綱未有不俯首受治者也嗟夫此墾民也夫非猶是吾魯之父老兄弟哉顧何忍令遠徙三千里苦力五年餘而使其淪陷於此也又何惜清理此原有之欸而慰此延頸望救引領請命之哀鴻也紀者目覩耳聞據事直書罔知忌諱知我罪我俟諸國人

哥老會紀事本末

河套哥老會卽四川袍哥會之支流發源於川省蔓延於大江南北旁溢於後套後套之有哥老會始於咸同間西夏金鷄堡之役金將軍所部多南人凱旋道經後套留套治生業哥老會之根卽於是伏焉該會江南分幫川省分堂後套分排名異而實同其主旨以金石同盟堅明約束爲體以任俠尙義舍命不渝爲用會中向無會首會長名目凡有權力者統名之曰大爺其下亦分職辦事大爺主中堅運魁柄生殺予奪高下在心有雷霆不可藝之威有神聖不可侵之勢會律極嚴有違犯者輕則鞭背灼膚重則立置重辟刀踞水火不能緩須叟死原夫哥老會之緣起其始則胚胎於有清竊據中夏恣肆殘暴有明諸先烈糾合同志希圖恢復不得不多樹旂幟秘結黨會厚集勢力其繼則再接再厲再起再仆韜光匿采羣思蟄伏江湖保持其固有之勢力希圖再舉指天誓日椎心泣血遂成此牢不可破之幫會迨至嘉道以後各幫會堅苦卓絕之旨日湮奇梧英雋之材日少狡黠桀驁者流遂起而承其乏出奴入主其賢者樹黨結援憤世嫉俗不肖者招亡納叛虎視鷹瞵變本加厲久之

臨河縣志

卷下

雜記

五

浸失其本旨然其蟠結堅固伏之勢力固自在也河套有清光緒末葉五原廳開始分治漢民寥落智識短淺最易煽動哥老會蔓延綏區幾有不可禁遏之勢宣統三年西排哥老會大爺楊建寅馬景濤藍玉堂乘革命紛起因利乘便由阿拉善王旂地假借革命名義揭竿聚衆東犯臨境大肆劫掠十一月攻陷強家油房墾務分局焚掠一空當是時套民經外蒙內犯驚魂甫定突聞會匪勢汹汹一夕數驚西路人民均紛紛逃竄幸綏遠當道派哨官張保和率四旂馬隊平之楊馬蘭各首領均漏網其勢尙未稍戢也民國四年記者在五原任奉張道尹秘令調查全境哥老會人數當卽查得只西區一隅已達四千人記者條陳謂秘密結會當然依法禁止惟該黨徒蔓延殆徧設概予芟除適足滋擾莫如不問會不會祇問匪不匪會而匪只治其匪會而不匪只解其會呈上大蒙嘉納是年秋會匪弓占元由南區警所叛變借寧軍馬統領鴻賓全力始克之該會黨魁梁玉亭盧金魁藍玉堂聞風遠遁十四年寧海軍馬統領子乾駐隆剿匪獲會魁梁玉亭立決之人心震懼十五年綏當道拏獲哥匪小五羊立置之法由是該會首領星散勢浸衰不振雖然其根蒂猶未盡除也蓋其深

固不可拔之勢流傳已歷有年所其統係秩然不紊其魄力能左右其部衆設能利用之使就我範圍小之足以保護地方大之足以捍衛邊疆所患者梟鸞同集蘭艾同升其中良莠不齊分子複雜篝火狐鳴蠢蠢欲動一旦有事乘機猝發如原燎堤潰大局已破裂無餘此又當懲前毖後者也方今村制修明詰暴禁奸責在區村但明曉順逆邪正之義厲行勸導糾正之功該會之癰結不攻自破自可消患於無形矣是在有地方之責者加之意焉

臨河縣志

卷下

雜記

建築門

重修臨河護城壩記

城何以護以壩防水患也自古有依山爲城者慮山洪之冲發也特設壩障之有憑水爲城者慮江河之漲溢也特築壩以堰之此因地設險因險立防實萬不得已之規畫非建城設邑之經制也若當騰騰平原眇眇禹甸如河套千里沃壤建設城邑只求辨方正位奠陰陽之序會風雨之和宅中以圖外居高以馭下據四方之形勝有犄犄之勢一旦有變不至於受制於人亦已足矣民國十四年臨河分治設邑按原案在强家油房設縣之議如欲憑水爲險則西枕永濟大渠逼渠立城仿山東濟陽齊河例塹以金堤當可收地之利不至受水之害矣否則就强家油坊南五里德和泉地方築城據高原亦可永絕水患也又不然當日俯從本地熟於地理者建議以原定城址移東半里許則全城盡佔高阜可免水患亦無不可也乃何以均不出此照原定地址一定不移遂使西半城基勢如覆孟大錯一鑄不可復挽卽令築護城壩以預防之亦揚湯止沸之計也按永濟大渠長一百四十餘里寬八九

臨河縣志

卷下

雜記

七

丈不等爲各官渠之冠病在渠稍比歲澄淤下流壅塞如人身尾閭梗阻中隔食水充滿日積日脹有入路無出路愈壅愈積勢必穿脇破腹橫決旁溢臨城適承中流此何怪比年水患難澹也十六年春三月永濟渠決口臨河城西洪水日漲紳董走告設治局請預防之弗報翌晨水薄西南城垣高不踰五尺西南隅有裂隙已爲水嚙紳董喘汗走告曰請亟令民夫五六十人加工塞漏穴水猶及止又弗報踰刻許穴大數簣水大至俄頃西城內成澤國縣署西急築堰三尺水始不東泛而西城建築市廛三四百楹圯塌無一存者計損失不下十萬元十八年三月永濟冰汛大漲李三渡口決口水備護城壩闔城文武官吏及紳董均守壩上設治局長黃彥邦王旅長奎元公安局局長郝晉綱教育局局長王文墀財務局局長李增榮建設局局長楊春林商會會長于相龍紳董王績世董繼舒康寶銓閻天昌分督民夫二百餘人負土束薪絡繹搶險明炬照耀三四里如列星時則天冥風急波濤汹涌拍壩水濺人身如珠瀉黃局長令各舖商居民羅酒漿餉民工相屬於道又懸重賞能守壩禦險者優賞之王董事侶督促尤力奈舊壩土料鬆浮千孔百隙水十挾十邊且穿且潰相

持三小時之久風暴起波流突漲五六尺漫壩而下不可復遏大衆不得已退守城圍扼要加高堰以遏水城得安全焉本年秋召紳董會議公推王董事侶充修壩經理王經理爲之加高培厚一月工竣計費洋六百元有奇十九年三月永濟上李三渡口層冰結壩冰汛陡漲橫決數口勢如萬馬爭馳二十一日夜半城西平地水四五尺迷漫壩頂直薄城垣金拆聲不絕城關商民皇皇懼幸王董事侶比年董治城垣工料堅固於城西南隅受水之處注重築堰是以有備無患城闔屹然獨全夏四月大召紳董會議往返籌議共商永絕水患之方略僉稱城址根本已錯另遷城社事鉅費重未敢輕言只有急則治標就舊有護城壩加高培厚俾令鞏固堅實以遏水患公推公正耐勞熟悉工程之董事王君侶專任其事王董事慨然力任之於六月一日開工炎天烈日往來巡視工次必令層層搥碾處處培補怠惰者必嚴斥之勤奮者必厚賞之以是羣情踴躍人人無苟安之心而工無曠人人無畏難之心而事易集王經理誥諭層焦指揮腕脫汗流相屬莫敢食息歷其煩絕未嘗憚煩也任其勞并未敢告勞也迄七月十日而工成計壩高五尺寬一丈長一千三百餘丈計用洋一千

臨河縣志

卷下

雜記

八

三百餘元落成日邑之人咸謂巍然砥柱全賴此蜿蜒大壩足以障洪流迴巨浸而今而後吾儕可以免其魚之患矣特表而紀之尙望賢達紳董預籌城週退水之方以疏水路而分水勢庶與王君修壩之功交濟爲用則更進而益善矣

民國十七年冬趙匪青山大股兩次竄擾本境軍團分途截剿地面遼廓匪勢漫散南竄北突東見西伏飄忽無常軍團應接不暇苦於消息之不靈偵諜之往往中梗也昌特提議裝設臨陝長途電話無事可以便防務通商務有事可以便徵調通諜報用費少而收益多設治局黃局長頗趨其議案經縣政會議通過嗣以趙匪全部消滅地方稍靖事遂中止十八年彭縣長蒞任首先注重地方交通擬創設全境大規模之電話就商於昌特召集紳董如王君樂天傅君田山魏君蔭堂會議決議由臨陝開始創辦以次推行委昌赴天津購料昌於十二月抵津接洽商行購訂妥協飛電催欸迄未見復不得已毀約退料返臨始知王君樂天自稱由包訂妥又不知料存何所以是推延稽遲於無形中又停頓焉十九年夏白縣長蒞臨適值馬楊等匪股叛竄臨洶洶勢莫遏王旅長率隊堵剿痛念夫軍報之稽遲徵調之梗滯呼應之不靈也力促當地之官若紳於最近時期安設臨陝長途電話時值張營長購到大批木料經建設局購訂齊備官紳公推昌督治其工爰於九月杪開始工作昌往來工次指揮督課無廢料無曠工至十月十一日大工告竣開始通話噫臨距陝僅八十里非有山川遼廓之險阻也裝設工料僅兩千元非有積萬累千之距欸也事經全體公認人稱便又非意見紛岐障礙橫生也然且旋議旋罷忽輟忽作歷三年之久始能實現者何也憚於創始樂於觀成恒情大抵然也昌服務是邦忽忽三載幸賴賢士大夫雅意提挈晨夕與共今日躬親是役深願出其全力不憚委曲周折以促其成亦聊以答地方人士之誠歎留雪鴻之印紀而已敢因以爲功哉

風俗門

臨河竹枝詞

砭骨朔風塞上高 氈裘重複尙輕飄 男兒也學婦人樣 一例束裝紅主腰
 納稼樂場有定程 連綿農事告西成 如何六琯灰飛日 打麥始聞叱犢聲
 陋俗流傳是棄嬰 家家父母太無情 只緣婦女懶閒慣 忍令呱呱付梗萍
 潺潺伏水貴於油 七日秦庭乞未休 戊巳一包馬一匹 香花膜拜獻渠頭
 後寢前堂溷不分 土階茅茨好鋪陳 硃紅長櫃栽絨毯 大鏡雙雙畫美人
 羊肚手巾包白頭 鄉村裝束也風流 阿儂不怕周郎顧 高捲車簾懶下鈎
 不重頭婚重二婚 孤鸞身價值黃金 周婆新訂親迎禮 送上陽臺更作雲
 嘉賓式燕樂如何 燴菜炸糕五味和 四盃四盤八大件 歸來夕照醉顏酡
 野人敬客好排場 大匹高登禮節詳 上等磚茶濃潑就 一盤瓜籽一盤糖
 酸菜點心麪片湯 田家風味客先嘗 賓來同抱如歸樂 風俗敦龐屬此鄉

臨河縣志

卷下

雜記

一〇一

厚聘索來色色強 立人三百帛承筐 專條又結十年約 五頃沃田養阿娘
 天桃灼灼野花繁 百輛鼓吹六市喧 廣廈安排千萬戶 邢譚何竇盡盈門
 娶妻也會生財香 紅毯分鋪跪拜忙 阿始一元姑五角 金錢亂撒喜洋洋
 於今宗法竟全刪 同母弟兄喚隔山 胡越一家成骨肉 誰云痛癢不相關
 鼻孔撩天投地呼 床頭低首念南無 鳩盤也要香花養 難煞人間小丈夫
 柳絲細雨海棠風 姊妹街頭一笑逢 相約明朝看跳鬼 弓鞋預繡碧芙蓉
 弓鞋三寸巧安排 五色綾羅手自裁 低囑阿姨牢下鍵 須防天足會員來
 多少工夫手自纏 凌波微步嫋如仙 陡聞天足重開會 霹靂一聲降自天
 自古人情富易妻 誰知後套歧中歧 當年多收十斛麥 臨老花叢覓別枝
 走馬少年小市東 銀鞍玉埒度春風 拚將糶出三倉麥 買笑千金付小紅
 駿馬嘶風盒子槍 地商子弟氣高揚 昨朝蓬戶今華屋 血汗十年夢一場
 漢蒙雜處須調和 蒙語學來費揣摩 執手穹廬通款曲 駱漿奶酒獻多多

百貨挽輸走漠沙米糧布疋酒糖茶商人慣說蒙古話吳越從今是一家
女男階級不分明蒙古俗流傳習慣成滅燭留髡同下幙聯床風雨到鷄鳴
黑塞輒廻學士駕青林不駐文人車俚詞聊備輶軒采豆架瓜棚洒墨華

臨河縣志

卷下

雜記

礦產門

探查狼山西八口鑛質記

耿秉信

陰山橫矗廣漠綿互千餘里榦脈發自賀蘭蜿蜒東來古者樹榆爲塞受降築城今日中外一家古蹟湮零無關體要惟登高望遠見夫岡巒起伏岩壑重沓其脈雄而厚其狀譎而恢意必有握瑾抱瑜沈璧藏珠韜光匿采瑰璋待啟精英待洩者所在多有由是延訪過客旁詢土人非諱莫如深卽習焉不察如是者有年余之企圖之心猶未有已也十八年冬余于役狼山之西二百餘里善丹廟時則朔風砭骨冒雪宵征同行者均瑟縮起玉樓粟余意興勃發竊幸此行庶有所得也入山後晨夕宿止均以蒙人爲東道主穹廬氈幕賓至如歸奶酒駱漿剪燭通欵乘間叩以山中地質及礦質各項蒙人酒酣耳熱得言忘形知無不言言無不盡蒙人多坦率胸無宿物其特性然也按狼山迤西自東五蓋口起至葛拉淖包止計三百五十里有奇其間直通外蒙計有八處曰東五蓋口曰西五蓋口曰達拉克口曰義太魁口曰紅淖包口曰達巴圖曰哈拉納口曰葛拉淖包口此八口前後之山脈石質約分三

臨河縣志

卷下

雜記

一一一

種自東五蓋口至達拉克口爲青石質前山煤礦苗最旺最淺距石面丈許卽現煤質惜多零星碎塊山後石中含有玉石水晶兩種距石面五六丈卽現惟玉石出品稍粗尙待淘洗晶石則秋水湛泓洵稱佳品自達拉克至紅淖包石質青黃錯出炭苗豐富距石面丈餘卽能得炭惟經考驗該炭油性缺乏入火炸爆或係石質未淨採取不得其法之故山後向產石棉石青色多碎片斷處多棉絲入火不燃俗謂浣火布卽此織就其信然歟惜無人就地提鍊以考察其用途是否爲出口貨之需要品安得廣延中外科學家一考驗之也由紅淖包至葛拉淖包百餘里石質雜紅黃沙綠三色石重量倍常石而質堅逾常至間有勢如蜂窠細孔映日作作有鋸據一般推考礦質者言重量之石卽石青石綠類蜂窠之石卽含有五金礦質之類惜蒙人閉關自守不肯發其藏又惜夫地限遐荒無專門名家一化驗之又無明通之工師完備之機料設場開採依法化驗致令棄寶於地此真可爲太息者矣用特表而出之貢諸簡端以待後來者考證焉

古朔方郡鹽城礦產記

按伊克昭七旗之鹽城湖淖惟鄂爾多斯爲最多蒙地莫大利源將於是乎在惜蒙旗棄貨於地不知經營利導開闢而發展之也特詳列於左

曰長鹽池在右翼前旗南三十五里

曰紅鹽池在右翼前旗西南三百里

曰大鹽濼在右翼前旗東五十里

曰特默圖插漢越沒濼在右翼前旗西三十里

曰毫賴甲達亥水淖方圍約十里距鄂王府西南二百七十里

曰迭不拉亥水淖方圍約十里距鄂王府西南一百九十里

曰摩多圖察汗淖方圍約十里距鄂王府正東一百五十里

曰大壠池淖方圍約二十里經本旗派員設局採取出售每斤一文二厘收稅一文產銷甚旺靖定兩邊及本旗仰給食用距鄂王府西南三百四十里

臨河縣志

卷下

雜記

一三一

曰荷池淖方圍約十里一切辦法銷路同上距鄂王府西南三百六十里

曰腦包池淖方圍約十里一切辦法銷路同上距鄂王府正南三百八十里

曰察斌達布素淖方圍約三十里鹽質淨味佳僅供本旗食用不知推銷他處距鄂王府西南一百七十里

曰納林淖方圍一十里出城甚佳惜無人包採距鄂王府東北八十里

曰察汗淖方圍二十里出城最佳經鄭張兩商人包辦十年每年納租銀千兩

曰巴彥淖方圍約二十里距鄂王府東北一百二十里

曰敖龍淖方圍約十里城質甚佳無人包採距鄂王府東南十五里

曰大小克泊淖方圍約十里距鄂王府東北一百六十里

曰烏克淖方圍約十五里距鄂王府東北一百八十里六台地內

曰達拉吐魯水淖方圍三十餘里距鄂王府東北一百六十里

曰皂素水淖方圍約十五六里距鄂王府東北一百六十里

曰伊哨城淖方圍約二十里距鄂王府東北一百四十里

曰沙拉可免水淖方圍約三十里距鄂王府東南六十里

曰哈達免水淖方圍約二十里距鄂王府東南七十里

曰毫賴免水淖方圍約十里距鄂王府東南六十里

曰烏爾杜水淖方圍約十里距鄂王府東南百里

曰可克城淖方圍約二十里城質較劣無人改良距鄂王府東南一百五十里

曰哈比里汗奴素水淖方圍約十餘里距鄂王府東南一百五十里

曰叨好免水淖方圍約十里距鄂王府東南一百里

曰鋼達氣烏素水淖方圍三十里距鄂王府西南一百六十里

曰可克烏素水淖方圍二十里距鄂王府西南二百二十里

曰沙拉烏素水淖方圍七八里距鄂王府西南二百五十里

按以上各池淖或產鹽或產城所謂地不愛寶取之不盡用之不竭者是也惜封閉自守

臨河縣志

卷下

雜記

一四

未發現者不能創闢已發現者不思改進致令鹽城之大利不能供軍國之用良可惜也
該地卽古朔方郡屬地究竟某地某淖隸屬朔方某縣則莫可詳考用特表而出之以見
蒙荒否塞二千年來之地利竟闕遏不發也留心政治與實業家應如何急起以赴之也

古蹟門

高家油房古城考

距縣城東北九十里距五加河南岸十餘里高家油房地方有古城一區周圍千餘丈城堞久圯高不知其若干尋丈垣厚二丈許土堅而白若間灰石碾之猝不易破城內壇廟官廨基址均沈圯無迹闔城無碑碣無塔表創不知何人何年何月日并不知何名有清光緒三十一年河套蒙地報墾地商爭就地開渠城當永濟大渠稍路穿城開渠墾地八尺許發現古式盔一具形似兜牟較常盔略小質以銅製出土已破碎無完質上飾珠數十粒大如豆小如黍爲土蝕久色黯然無華土工爭攫取之時爲于氏以廉值贖去城據高原土質肥沃均可耕種收益倍常地土人呼其城爲楊家營俗傳宋將楊業兵爲北胡敗息兵於此因城之然枕河屯兵非連營列寨不足以聯聲威而當強敵楊業亦知兵者安敢以孤營犯此險著故楊家營之說殊不足信或又曰清咸同之季金將軍大軍征回凱旋留兵就食河套或其當日營壘歟然自咸同迄今不及百年留屯當作久計其建築壁壘工堅料實經久不圯

臨河縣志

卷下

雜記

一五

何至蕩然無存若是又未可信者或又曰本境爲西漢朔方郡地郡隸十縣如渠搜廣牧等縣以地形測之當古臨河東北河南岸一帶今城或卽漢城歟不知朔方郡與所隸十縣當日同時并建嗣以華夷代嬗兵燹迭經二千餘年之遷流轉移古城無一存者則今之古城又非漢之舊城又斷然可信焉作者以是之故曾親歷其地詳察周巡并諮詢故老莫得確證一日於城隅見有古井一所井大於常井兩倍磚堅厚異常磚色舊而紋理堅細洵古代物井水甘冽終日汲縵不停而取之不竭澄之不滓本地牧畜者均取汲不絕於道統計每日可供三五百牛馬之飲料亦神矣哉查張氏綏乘一書新受降城北有鵬鵠泉斯井也借非有名泉在下又烏能取不盡用不竭如此也其爲鵬鵠泉庶乎近之井以泉名則是城當爲新受降城也亦有足信者惟查唐書中受降城屢經河患李吉甫請於天德故城修新城李絳盧坦謂舊城當磧口據要衝得制匈奴上策又豐水美草邊防所利况天德故城僻處确瘠去河絕遠烽埃警急不相應接是無故而蹙國二百里也云云觀去河絕遠蹙國二百里之語則新城當在南河之南仍非今之古城可知總之漢唐無可考已河套淪陷在李

夏及遼金元代最久沿河設險必多立城堡堅壁樹柵以限戎馬借書闕有間朔夷又不嫻紀載遂今湮沒無傳生千載下而欲詳蒐千載上之事蹟已非易易况又迭經淪陷典物金石銷沈掃地徒令文人學士披荆斬棘剔鮮掃苔考證無由良可慨也

訪古城遺址

落日照頽垣晚晴鴉背翻春風墜麥秀秋雨野花繁
城荒狐何憑社空鼠失穴何年重建築宏圖大式廓
祠壇委荆榛市廛夷萊莽剩有鷓鴣泉終古發清響

登狼居胥山

漢室喜開邊式廓大九有北征奮撻伐揚威禽夷醜票騎出雁門誓師椎牛酒單于遴精驍
幕北戰雲黝天風浩莽吹破空播塵垢漢幟大合圍鐵甲突圍走七萬全軍墨降虜盡授首
幕南無王廷烽烟靜刁斗大封狼居胥玉檢金泥剖告廟羣獻俘大勛集功狗戰征爲國際
金石垂不朽

臨河縣志

卷下

雜記

一六

登高闕塞

立扼單于吭坐繫白羊頸漢家重邊防龍旂高闕擁
雪花滿刀弓高闕孔道衝爲爭國際位百戰足言功
莫道陰山險天然闕石門黃流東折處秦漢戰雲屯

遊洪羊洞記

洪羊洞爲狼山古蹟之一徧考傳記廣攬圖冊其名不傳而土人嘖嘖盛稱之或以爲風景絕佳或以爲靈異昭著若以爲惟一之名勝十五年來余以匏繫一身未暇一往探之是亦憾事也戊辰七月臨邑解組借廛僑寓意致蕭閒九月中旬天高氣爽邀商會劉會長明卿于會長清泉建設局楊局長序東聯袂前遊時值夏歷中秋前野外秋田多稼黃雲萬頃年豐人樂田歌盈耳一路迤邐入狼山灣路折西行時則投止氎幕酪酒聯歡時則息駕山家鷄黍通款早起則朝嵐迎旭涼露濕衣晚眺則暮靄窅林斜陽掛樹西山爽氣挹人眉宇余年來簿書鞅掌塵垢滿胸一旦置身山水間令我萬慮皆空飄飄然有出塵之想余深喜此

行爲不負矣第三日抵阿貴廟廟係蒙人建距狼山灣二百餘里廟居半山峯迴處有喇嘛十餘與同行諸君子皆素稔據云洪羊洞距廟西三里許凡遊洞者皆借榻於此次晨沐盥訖各食炒米一撮奶茶一盞出廟兩喇嘛前導逾峻坂兩折見西面有陡崖如壁立高矗清冥洞門東向寬三尺許高六尺喇嘛導入中虛無一物面積方丈高下僅容中人軀西面有石門大如合簣喇嘛俯身導升勢如登坂始則偃僂若膜拜朝頂狀三十步後始得昂首進穴中石隙露微光僅辨階級但聞風聲狂吼人兢兢欲墜手捫兩壁石滑而膩階盡百級豁然開曠身已在石室中室無窗無門高二十尺寬廣面積方十五六尺東西有石罅穴透光線通空氣似人力鑿通者四壁石作赭色色鮮欲滴北有石佛高丈餘趺坐作大歡喜狀佛像上有巖泉直噴佛頂巔而下如瀑布如貫珠如醍醐之交灌無稍止息佛座下有窞井水瀉其中黝深不能測深淺據同行喇嘛稱此井通西藏兩日夜能往返言之容甚莊噫是誠喇嘛之言也知有西藏而已矣室四壁平削無斧鑿痕似純出天然者石隙風厲甚同行者均起粟凜乎不可久留遂由舊道而下至洞外東望距洞五百餘碼有懸崖高聳百丈崖半

臨河縣志

卷下

雜記

一七

有巨物縋懸形似長匣長丈餘粗如五石之甕以望遠鏡測之色黝黑似以鐵製兩端若以索縋繫確係崖外附屬物擬近前詳察奈中隔深澗怪石枒杈如虬蟠如虎蹲如筍排如劍豎同行者均不敢冒險而止返廟詢諸老年喇嘛據云相傳數百年來卽有此物樵獵者結隊紆道踪跡之終可望而不可近云云該地久隸蒙疆或係紅教中人故作覽勝術特矯揉造作以神其說歟未可知也余此行往返五百里需時十餘日尋幽攬勝暢然意滿所不足者摩崖掌壁剔蘚掃苔竟莫得一字之標記相與考證其事實始末是誠一大憾事也夫洞近狼山二百里地當要衝并非絕幽極深人跡不能至之區况狼居胥封山燕然勒銘下至受降築城二千年來必有王公大人宿將魁儒相與籌邊設險樹埃立屯爲之鋪烈揚功鏤金刻石以紀盛美而垂不朽卽洪羊洞亦必有名流之車塵馬跡流覽紀載垂諸文字以志形勝奈何縋險窮幽卽殘碑斷碣竟掃地無餘推其原因一則由於表功之觀平戎之銘必有發揚蹈厲犬羊醜虜之語彼族惡其無狀也蹈而去之亦固其所一則由於淪陷日久彼族故步自封迷信風水一草一木不敢輕動其視千里陰山皆其世守故物並不知保存古

物珍護文字爲何事所以陰山諸名蹟如榆塞長城高闕塞拂雲堆范夫人城均卓卓大者何至今無一字可考樵牧摧殘牛羊踐踏彼族當不復措意焉嗟嗟處窮荒絕塞聲教闕寂之地而欲探訪名勝遺文落落墜緒茫茫憑弔深之不禁感慨係之已

游洪羊洞

古崖嵌且岑 古洞窈而深 悠然遠塵囂 天風撼不禁

巖泉倒流冷 醍醐正灌頂 我佛空色相 悟激秋水影

石磴接天梯 一步一膜拜 同登歡喜地 靜觀大自在

榆塞懷古

聞道長城路 編榆已樹關 胡人同一哭 不敢度陰山

大河已南遷 陰積撤亭障 開關竟延敵 誰爲虎作倀

在昔重天塹 而今大無外 風會隨推移 何必論成敗

李陵碑考略

臨河縣志

卷下

雜記

一八

按李陵碑舊有兩說一則謂碑在宣大交界山畔一則謂碑在後套狼山畔查西漢武帝時匈奴數爲邊患陰山高闕塞左右爲入寇必經之路中朝命將出師往往踰雁代度朔方直薄陰山前後北暨瀚海時與北夷相馳逐李陵爲漢代驍將建旆從征揚威絕塞邊民受其保障立碑表功以誌紀念亦事有必至是碑在狼山山畔其說較有據也光緒末葉貽欽使來綏辦墾雅意訪求古蹟派員赴狼山灣一帶訪查洪羊洞李陵碑諸勝蹟歷時雖久均已確得其所在本邑士紳至今猶言之鑿鑿余於己巳冬月承乏縣志總編纂之席蒐采古蹟於李陵碑反復考查邑人士同聲稱爲在狼山深處至詢以碑在何處建自何年何人均瞠目莫應又詢之狼山土人又言人人殊大抵事誠有之惟不能確指其處耳余嗒然意沮者久之今春與友人李君聖三縱譚此事李君曰先生欲知李陵碑發現始末乎余爲貽欽使派查古蹟嚮導員之一當時同行委員二蒙員嚮導員二兵士四裹糧束裝由狼山西二百餘里之高闕塞自西徂東到處探蒐於阿桂廟山麓得探洪羊洞之勝又東進陟層巒踰疊嶂縋絕壁搜丹穴時而斬荆披棘時而攀葛附蘿迤邐東來備歷險阻直抵狼山口尙無蹤

兆同行者幾欲廢然返矣乃鼓餘勇東行二十里偶遇山畔牧豎詢之遙指東北十許里高巔有大碑屹立殆謂是歟當約牧豎同往瞻以重賞始踴躍前導途經羊腸凡三折坂而高峯矗前同人攀登猱而上歷兩時許始躋其半有側坡方三丈中立碑高丈許闊四尺苔色斑斕字跡模糊窮盡目力僅辨爲李陵碑不署建立年月及人姓氏二千年古物惜爲風霜剝蝕其不至漫滅者幾何矣該山向無主名山口不通後山商路闕絕人跡地屬蒙旂當日未便特立標誌以故途雖已經而再至其處第見黃葉漫谷白雲迷徑如天台路迥桃源港斷此何怪土人故神其語目是碑爲或隱或現也乃閱時不久有自山中來者詢其碑則云已僵臥沙土是殆蒙人守閉關主義此疆彼界故步自封一則恐當道據碑爭界一恐外人自此遊覽不勝其煩故培而覆之必欲消沈之而後快究竟班班可考余固得諸目見者也云云聖三余之執友也亦當地之耆獻也言之足徵紀之以爲考古之一助爾顧或者曰執是說也何解於宣大間又有所謂李陵碑者然昭君墓綏區凡兩見何妨并存之以待博雅君子參考焉

臨河縣志

卷下

雜記

一九

李陵碑

誰教孤軍陷	將軍百戰空	漢家恩意薄	錄罪不錄功
誰與紀邊功	三軍悲路窮	殘碑沈沙漠	夕照野花紅
虜廷望陰山	豐碑矗天起	縱鐫百戰功	難洗千秋恥
英雄一失足	北廷拜夷虜	何年樹華碑	徧佔漢家土
胡騎將三萬	倒戈効血戰	碑畔夕陽紅	返照將軍面
巍然山中碑	愧對海上節	漢廷伸明罰	罪案定如鐵

燕然勒銘懷古

一將功成萬骨枯戰功何庸大張鋪君不見小戎婦人思板屋石壕老嫗充軍徒又不見白骨高墳曲港岸碧血橫流長城窟月昏雲黑燐火聚新鬼故鬼悲嗚呼我輩同種本一家何忍肉薄相剪屠爭地爭城爭侯王威尊命賤爲前驅凌烟伊誰題名字雲臺何人列祠廡天子窮兵喜開邊多士紛紛擲頭顱華碑刻劃臣能爲天語褒嘉出中樞英雄盡入吾彀中藐

爾功狗盡庸奴功成戰士歸不得雪滿刀弓戍山隅我今登高尋片石斜陽古塞剩啼鳥自古邊功不敵患戰場憑弔空歎歎

范夫人城懷古

漢家天子喜黷武陰山設險抗醜虜相其陰陽觀流泉邊城矗起維天柱雉堞左倚拂雲祠龍堆右襟燕然府削之平平築登登將軍經營心彌苦大功未成身先殂此事留待後人補崛起金閨夢裏人珠壘金墉精練組繡鞍有淚春愁多銀甲無聲夜光吐翟翬威懾憑城孤環珮聲伏出林虎十二瓊樓禁斗杓三千粉黛執桴鼓卸却金鈿貫藥糧戰士瘡痍徧指撫聯得衆志可成城娘子軍威莫余侮雁門鼙笳動地迴貳師長勝馳風雨夫人開關挫凶鋒屹如山立嚴卒伍兒女到此是英雄畫像雲臺饒媚嫵丈夫報國妻報夫名字無傳沙沈羽史官書勛有闕文巾幗芳聲壯千古

遊蒙旂各昭廟

勅建卽爲昭私建卽爲廟羈縻原多方神道以設教

臨河縣志

卷下

雜記

二〇一

政府示優崇無上賚尊號輿服踰章制金碧飾廟貌曠悍猛鷲氣寬裕溫柔道千族盡皈依大化不言造天親夷土苴宗祧棄曇泡梵音達百里身如靈山到

北假戍考

按方輿紀要北假戍在廢豐州西北酈道元曰自高闕以東夾山帶河陽山以西皆北假也史記秦始皇三十三年使蒙恬渡河取高闕陽山北假中築亭障以逐匈奴漢書元帝初元五年罷北假田官按北假之義以地假民使各從事墾植也所謂陽山者卽陰山南向向陽之地山北爲陰山南爲陽非陰山外另有一山也查古黃河距陽山二三十里地傍山隈石骨草根不便耕作且隙地有限何能容多數人之耕種北假範圍當合故河南北之地言之是五原南部朔方北部均隸於北假也明矣

西受降城考

按西受降城在廢豐州八十里志云本漢朔方郡臨河縣舊理所唐景龍二年張仁愿置城

於此開元初爲河所圯總管張說於城東別置新城元初七年河溢城南面多毀壞八年振武帥李光進請修受降城兼理河防李吉甫請修治於天德故城李絳盧坦以爲舊城當積口據要衝得治匈奴上策又豐水美草邊防所利今避河患退二三里可矣奈何捨萬代久安之策爲一時省費之謀况天德故城僻處确瘠去河絕遠烽埃警急不相應接寇忽唐突勢無由知是無故而蹙國二百里也上卒用吉甫策於是西城遂廢惜哉又元和志西受降城在豐州西北八十里又有李華三城韓公廟碑序云

烏拉特旂諸泊諸泉考

按烏拉特中旂勒炳戈壁之北曰察汗泊曰烏蘭鄂博南北二泊曰孤吐魯烏蘇泊曰和碩山東泊在和碩山東曰那倫烏蘇泊在白英諾綠山北曰夾大廟山三泊在夾大廟兩山之間曰木倫沙河泊在一合戈壁之東曰恩格里泊在狼山西北麓古漁海也清一統志烏拉特下哈拍察齊泉在旂西四十五里藍泉在旂西九十五里臺泉在旂西北四十里插漢泉在旂西北五十五里克爾布泉在旂西北六十五里五藍拜星泉在旂西北九十里布各泉

臨河縣志

卷下

雜記

一一一

在旂西北九十八里冷泉在旂西北一百五里蒙古名魁屯杜窩勒泊在旂西一百十五里托博克蘇海泊在旂西北一百八十里魚海在旂西北一百里蒙古名札哈蘇台亦名魚兒海又謂之魚海子唐高適詩洗兵魚海雲迎陣是也今按諸泊共十有一而今圖烏拉特境內山北之泊亦十有一數相符也由此推之陰山以北泉泊星羅碁布無事可以興牧畜開渠道闢地利有事則到處水草甚便亦可供行軍之用於以見天下無廢地人自廢之天下無曠土人自曠之也用質之留心地理者

赫連夏故都考

按大清一統志鄂爾多斯旂隸於朔方郡地該地寧跳梁之北今名橫都城卽赫連之統萬城道光二十五年懷遠縣知縣何炳勳奉命往查統萬故城由縣西渡磨姑河又西水河又西渡無定河地勢漸高二里許至舊相傳之白土城細加相度在懷遠城正西九十七里黑水河在無定河東距縣五十里有淖泥河東入無定河之下流疑淖泥河爲古黑水其地有土城週圍三重俱用土築渡無定河西行二里許進頭道城又西半里許進二道城又西數

十武進三道城頭二道城內但餘瓦礫三道城內南面西隅鐘樓東隅鼓樓僅存基址堅築白土墩高五六丈無級可乘鐘樓尙堪登眺高約十餘丈白土築成雞籠頂式大厦一間半已圯其半懸鐘屋頂形迹宛然週圍飛欄八層插椽孔穴歷歷可數南面列土墩七堅硬如石似係臺樓之基北頭有白土坡似係宮殿之基東西兩角亦有土墩當卽俗所謂轉角樓者內城東西不及一里南北約一里有餘噫嘻以赫連夏當日志吞六合威懾八荒其力非不能驅萬民之力以營其城闕宮室其權非不能收一世之財以恣其游觀宴樂然且安於簡陋如是以視市井小夫忽而置身通顯脾睨自若興作從心崇墉百尺傑閣千重鐘漏未歇華屋變爲山丘長門鞠爲茂草其識量相度越夫豈可以道里計耶

朔方臨河故城考

按朔方故城在五原東南北河南岸或謂什賁城漢置屬朔方郡又按臨河故城在朔方縣故城西北漢置屬朔方郡水經注河水自高闕南又東逕臨河縣故城北又南河東逕臨戎縣故城北又東逕臨河縣南按黃河北流逕故朔方之西行五百餘里一枝分爲二歧東注

臨河縣志

卷下

雜記

一一一

水經所謂南河也其北河流至套外之阿爾布坦山南迤西溢爲大泊土名騰格里腦兒卽古屠申澤也自此屈而東流過古高闕南行二百里許稍東南流又折而西南與南河合水經所謂北河南屈逕河目縣左又南合南河是也始直向東行逕古五原之南至大土爾根河入河處始轉向東南行過古東勝州境以地勢測之臨河縣在北河之南南河之北水經所謂自高闕南而東逕故城北者北河也自臨戎縣北而東逕縣南者南河也

漢度遼營考

按漢光武建元之季匈奴內訌互爭雄長八部大人立呼韓邪之孫比爲大單于歟五原塞願永爲藩蔽捍禦北虜光武許之詔立南單于於五原置中郎將以領之於是匈奴分爲南北二部尋詔徙南匈奴入居西河美稷南匈奴遂於北邊列置諸部王助漢扞戍北地自朔方至代郡皆由匈奴諸王領部衆爲郡縣偵邏耳目於是匈奴之衆遂與漢族雜處而啟五胡亂華之漸匈奴亦懼求和親不許時北匈奴數寇邊明帝時求互市漢廷冀其交通不爲寇許之遣鄭衆北使南單于知之頗懷嫌怨欲畔密因北使令遣兵迎之鄭衆疑有異徇得

之乃上言宜置大將軍以防二虜交通由是始置度遼營以中郎將吳棠行度遼營將軍事屯五原曼柏按南匈奴界自朔方而南北匈奴界自五原而北度遼營隔絕南北當在朔方五原兩界之交又查古臨河居朔方西北曼柏居五原南界度遼營當在曼柏臨河之交今之臨河北境高油坊之古城垣壘堅厚土色古黝非近代工作且近枕北河遙控狼山要口形勝天然或卽漢之度遼營舊址庶幾近之惜官書散佚碑碣無存徒使考古者登高憑弔良可慨也

十六國都邑沿革考

五胡十六國遞嬗建置都邑多在山陝直豫地後先相望河套惟盛樂統萬城最稱古都其他劉虎建國曰鐵弗地在山西邊外及後套南部其後裔衛辰攻赫連勃勃不能克辰卒爲其下所殺勃勃奔薛干部按薛干爲匈奴別部雜處河套地郝連氏雄長諸部高視遠跋盡取河套地而有之遂建統萬城於河南其遺址在今之寧跳梁北卽土人呼爲橫都城是也

臨河縣志

卷下

雜記

慈善門

庚午縣境賑捐募啟

敬啟者臨河僻處綏邊地曠人稀向恃墾植為生計比年水利廢湮渠圯田蕪重以兵燹之
頻遭遂至蓋藏之立盡又兼各路扣門乞糶絡繹舶輪求過於供輒告糧荒客歲春夏奇旱
秋季兵災雖興東作未卜西成乃本境之饑民方思雁集外來之災黎又悲鴻嗷散處計二
百里屬集至四萬衆處則穴居巖伏沐雨擲風行則兒啼女擗採藜掘藿始也草猶可茹登
高作采薇之吟繼也樹已無皮比戶下繫桑之淚當是時也求嗟來其何地思蹴爾其誰人
此真仁人君子目不忍覩耳不忍聞者已同仁等患忱剝膚誼切援手勉搜灰燼之餘同效
纓冠之義公組臨河賑濟災民籌備會其大旨先就本地募糧散放急賑一面願乞
各省各界廣發宏慈完成善果同仁等號呼奔走舌敝唇焦幸子敬好義指困無餘王蒼施
仁傾囊不吝值此金穰而木饑欲思補瘡而剝肉亦可謂杯無餘瀝斗無顆粒者矣無如杯
水莫救燎原寸壤難塞巨浸倘使後來不繼勢必前功盡虧是有數之饑民仍不得生恐無

臨河縣志

卷下

雜記

二四

數之饑民誰甘忍死鷹饑思搏鹿鋌走險隱患何可勝言同仁等草杼短簡用代哀鳴伏懇

仁人善士
達官長者 恢如傷之抱廣普度之仁

惠普發棠維多多其益善

恩周移粟喜喁喁其來蘇我數萬溝瘠千里涸轍舉延喘須臾引領企踵共盼

大澤之將至此則日夜馨祝而無已者也儻蒙

惠施請書

台銜

臨河創建育嬰堂募捐啟

粵維大學絜矩政在恤孤葵丘立盟道重慈幼古之人情殷少懷由來尙已後套地僻俗漓
棄嬰之風相沿既久已成習慣或則菽水分甘棄諸草陌或因烽烟遁跡寄諸桑園猶可說
也所不可解者富室大族不知出洗兒之錢祚薄門衰竟各出乳傭之值任婦女之嬌懶忘
却十月呻吟聽肥字於牛羊何計三年懷抱謂人父謂人母自斬宗祧靡所依靡所瞻甘荼

血系烏鳥尙知哺雛老牛且思舐犢愛子之心鳥獸且有同情人何以堪此真百喙不能解其迷而破其惑者也同仁等惻然動念公同籌議擬建築育嬰堂一所惟一腋不能成裘端資羣集一木不能支廈要賴衆擎募來金光徧地天花散祇孤之園結到夏屋連雲落蔭免墮溺之劫出顧入復無父亦依抓棗覓梨不母可活按籍可考人人不昧所生普被無遺事均歸實際幼吾幼以及人之幼道在推恩親其親以及所不親理先保赤此真普渡之慈航宏濟之寶筏也儻荷慨助請書

台銜

臨河縣志

卷下

雜記

二五

贈別門

送彭縣長進吾先生有感

綜覽全局眷西土特簡賢良出大府景略謀猷穆之才參贊秘樞劍光吐平陸甘棠塞下移
狼山潤灑如膏雨下車首先軫民瘼巡行郊垌問疾苦厲行團政壁壘新軌里連鄉嚴卒伍
鶴唳無驚烽燧銷四民安居幸如堵君不見法明能懾當路狐威重足伏在山虎又不見自
古致治起於鄉村政刷新重織組電政路政促并營交通如同履庭戶鬻舍蠹起排雲開平
民教育陶冶普經營民堡不日成從此我民不野處官書披覽宵旰勞起視霜天月正午政
績報最上考書軍幕依之如肱股寵命下頒賀鶯遷士民旁皇心無主借寇一年志未償臥
轍攀轅式歌舞來何暮兮去何速德政留待志乘補

紀異門

山市影談

長夏午夢初覺夕陽欲下偕二三同人延爽於古柳陰畔時則鳴蜩噤咽倦鳥歸巢披襟當風各道生平奇聞創見事余引聊齋山市記索解諸同人或以爲筆墨游戲或以爲幻由心生或以爲借諷入市者之無色非空諸同人議論紛紜莫衷一是張君海瀾起而言曰諸君少安不必爭辯此紙上之異聞請靜聽我目中之怪狀本年四月余小住勝家營子經營農事一夕夜初晴長空如洗星月皎瑩余目無障物胸無宿芥登屋遠眺狼山迤西諸峯翠煙數點爽挹眉宇倏爾山麓雲氣迷漫層巒頓失突見危垣百仞高聳雲際西望綿亘七八里雉堞筍排恍見旂旌森樹甲士環立城樓上轟霄漢窮極壯麗城門出入人如蟻行如繩貫一炊黍時忽而雲烟萬狀化爲崇樓傑閣連棟接楹不知幾千萬落窗扉皆洞敞人或倚欄立凭牖伏傍檻坐平視則六街雲連九衢霧列朱簷連棟碧瓦覆甍有若坊者有若肆者有若堂者有若行棧者有若官廨者有若兵舍者人有若肩挑者有若背負者有若輦運而挾

臨河縣志

卷下

雜記

二七

持者百貨山積五金光眩車如水馬如龍轂相擊肩相摩酒帘飛揚書幌高揭五光十色錯采散綺萬縷炊烟高入青冥余神搖目炫略一停瞬忽而大風猝起雲氣蒼莽已而風定雲收一切烏有噫嘻奇觀哉其漢唐故城精氣未盡時而發現歟抑山氣蒸騰化爲幻象歟奇乎幻乎吾不得索其解吾其叩諸山靈

余太龍見記

大余太北倚陰山山綿亘數百里古稱天塹所以界中外防戎馬也其山皆軒豁呈露并無幽壑深淵可以窟穴神物也山勢環抱處往往蒙漢人聚族而居以耕以畝以樵以牧皆以爲常距余西五十里刀浪胡同地方於民十九六月十七日村有蒙婦汲於井是時也天地倏晦雲氣迷濛四布村人突見空際有物長數丈蜿蜒盤曲如星馳虹流向村際下垂村之人弱者屏足避强者瞠目視驚聞毒霧腥雨中村婦嗚呼聲尋寂然既天稍霽略可辨色循聲迹之去井里許硫磺氣刺鼻欲嘔知有異逼視之見蒙婦臥井畔井上翹巨首如五斗栳栳怒睛大於盃睽睽如巖下電角嶄嶄齒斷斷揚著噴沫鱗甲作淡金色擘擘有光頷以下

陷於井莫測其狀父老走相告曰此龍也夫龍之爲靈昭昭也乘乾健御陽剛孕於天池化於龍門朝遊蓬瀛暮遨滄溟上九天下九淵浩浩乎興雲作雨不崇朝而徧天下其功用抑何神也至其爲體也能大能小能屈能伸能隱能見能起能伏放之則氣吞八荒神遊六合斂之則蝸角可藏螭睫可巢卽令潛而勿用亦能遵時養晦遯世無悶而不悔必不屑以一鱗一爪逐聲光於流俗當夫龍之墜於井也有譁爲怪者有詫爲妖者有卜爲祥占爲災者而龍如故也鼎熱香酒釀爵俎登肉諷經禮懺梵音琅琅聞十里鄉之人駭汗相屬於道而龍如故也蠅蚋嘍之螻蟻附之牧豎樵子姍笑之丈人韻士悼惜之而龍如故也遲之久遲之又久地氣升天氣降山澤通氣膚寸雲合遠山近樹陰沈審暗遙望井側濃烟絮霧中恍惚有鼓鬣張吻之狀倏見電光如匹練隨霹靂而下是時雲氣盈涌有大聲發於井上如三峽倒瀉萬騎驕嘶黃龍已扶搖直上天矯盤旋半隱現於空際當其昂首天外略一騰蹕山川震眩風雨晦冥奇情詭狀莫可方物已而雲斂日霽時百里內正苦炎旱忽而大雨滂沱農民頌神功不置神哉龍乎何不幸而不善藏身竟至墜落如斯也又何幸風雲際會終得

臨河縣志

卷下

雜記

二八

克自振拔也嗟乎在天在淵或見或潛龍亦率性而遊任天而動而已矣古今來升沈顯晦之迹盍以龍爲鑒諸

附記

五原王紳同春行狀

民國八年春文堉奉令卸五原任邑紳張君厚田等來署盛述王紳同春開闢河套殖我民族事蹟綦詳請爲文以狀之爰撮叙其崖略爲之狀曰按王君同春字濬川直隸行唐人幼負異稟嬉遊里巷不與羣兒伍人爭異之髫年隨其先德來河套縱覽周原嘗語人曰沃野千里何居乎蒙人自封自閉爲其有殖我民族之志固已夙矣於是攷求農牧實業孜孜不遑而其生平樂而不厭嗜而彌篤有與終身結不解之緣者厥惟水利同治十二年首先創開老郭渠光緒六年開哈拉各爾河嗣又開渠口至梅令廟五加河七年由和合源創開永和渠至補紅村十五年由老郭渠上游創開同和渠復由土城子開口接至同和渠改名義和渠渠長百餘里二十五年創開中和渠至五分子二十八年隨墾務督辦貽欽使週勘永豐剛黃沙義通長各大渠指導動合機要每有大工他人咋舌束手退避不遑者先生從容措置高下之宜向背之勢得失順逆之局均能測於幾先定於臨事一時造門請者得其片

臨河縣志

卷下

雜記

二一九

言一語大用之大效小用之小效是其果操異術哉蓋其經驗有獨至者然也普通工作無論已遇有疑難大工俛而察仰而思面壁終夜臨流癡立慮其結而不解也以無厚之精心入之慮其膜之不破也以至銳之果力出之及夫豁然貫通直有覺上下通明踴躍狂呼雖南面王莫易此樂者何快如之昔張南通與先生談水利終日無倦容導淮大計先生力持導入海之議南通深韙其說識者惜其未見諸實行也當光緒末季蒙旂猶守閉關主義報墾之地寥寥先生長駕遠馭出全力闢地五千頃開大渠三道待以舉火者萬家其真能造福我民族民生者爲何如耶一旦盡奪其所有而歸於公先生視之如棄敝屣若此其器識又爲何如耶先生持平平等主義尙博愛好施予光緒十七八兩年地方告凶慨出糧萬餘石二十七年歲大饑慨出糧六千石賑之活人無算辛亥王爺地劉天佑之變蹂躪河套無完土晉軍全部軍糧數千石獨力任之此其樂善不倦爲何如耶按臨河未設治前地方悉隸於五原臨河當日農業水利何莫非我濬先生經營締造之所賜士食舊德農服先疇至今父老猶樂道之用附志乘以志不謬云

